



CANSELOR

**Seri Paduka Baginda Yang Di-Pertuan Agong XII
Tuanku Syed Sirajuddin Ibni Al-Marhum
Tuanku Syed Putra Jamalullail**



KANDUNGAN 2002

Universiti Teknologi MARA

isi kandungan



Maklumat Korporat	1
Pihak Berkuasa Universiti	9
Jawatankuasa Pengurusan Universiti	19
Laporan Naib Canselor	27
Laporan Aktiviti Pelajar dan Persatuan	43
Laporan Penyata Kewangan	51

SEJARAH LATAR BELAKANG

Sejarah penubuhan UiTM bermula pada tahun 1956 seiringan dengan penubuhan Dewan Latehan RIDA (Pembangunan Luar Bandar dan Industri), pusat kuliah yang menawarkan kursus persediaan kepada pelajar berorientasikan pendidikan Inggeris.

DEWAN LATEHAN RIDA (1956-1965)

Dewan Latehan RIDA adalah satu inspirasi daripada Dato' Onn bin Ja'afar ekoran daripada lawatan yang dilakukan ke Ceylon (sekarang Sri Lanka) pada tahun 1951. Tujuan utama lawatan yang dibuat adalah untuk mendalami program pembangunan dalam negeri. Selepas lawatan itu, satu kertas kerja (kertas No. 10 pada tahun 1950 telah dikemukakan kepada "Federal Legislative Council". Kertas kerja tersebut merupakan asas terhadap penubuhan RIDA, sebagai satu badan agensi kerajaan. Objektif RIDA adalah untuk membangunkan penduduk dan meningkatkan ekonomi.

Pada tahun 1956 sebuah unit latihan yang diketuai oleh Encik Abdul Samad bin Ibrahim telah ditubuhkan. Ekoran daripada unit latihan ini, Taman Asuhan RIDA (Kuala Lumpur) dan Dewan Latehan RIDA (Petaling Jaya) telah dibuka.

Dewan Latehan RIDA memulakan operasinya yang pertama pada bulan November 1956, di bawah pentadbiran Tuan Syed Alwi bin Syed Sheikh Alhadi. Pembukaan rasminya telah disempurnakan oleh Dr. Ismail bin Dato' Abdul Rahman, Menteri Perdagangan dan Industri pada 14 Februari 1957.

Kursus-kursus yang ditawarkan pada ketika itu adalah:

- i. Kursus persediaan selama 2 tahun untuk London Chamber of Commerce (Peperiksaan Tinggi)
- ii. Kursus selama setahun untuk London Chamber of Commerce (Peperiksaan "Intermediate")
- iii. Kursus 2 bulan untuk pembuatan "coir" (Dimansuhkan pada bulan Mei 1957)

Pada tahun 1960, Dewan Latehan RIDA telah meningkatkan syarat-syarat kemasukan untuk kursus ke Cambridge School Certificate/Sijil Persekutuan Cambridge. Tiga kursus baru telah diperkenalkan:

- i. Stenografi
- ii. Kesetiausahaan (ACS)
- iii. Perakaunan (Australian Society of Accountants)

Pada tahun 1962, Dewan Latehan RIDA memperkenalkan kursus profesional seperti Pengurusan Asas Perniagaan, kursus persediaan kepada pelajar yang akan menduduki peperiksaan yang dikelolakan oleh Institut Pengurusan British (British Institute of Management). Pada tahun 1964, Dewan Latehan RIDA mengadakan majlis konvokesyen yang pertama. Seramai 50 orang graduan telah menerima sijil daripada Tun Abdul Razak, Timbalan Perdana Menteri.

MARA DAN MAKTAB MARA (1965-1967)

Semasa berlangsungnya Kongres Ekonomi Bumiputera pada 5 hingga 7 Jun 1965 di Kuala Lumpur, 68 resolusi telah dikemukakan; 22 daripadanya adalah berkenaan dengan pengkajian semula peranan dan objektif RIDA. Serta cadangan baru untuk mengukuhkan keberkesanannya aktiviti yang dijalankan oleh pihak yang berkuasa.

Langkah pertama yang diambil ialah menukar nama RIDA kepada MARA. Menurut Tun Abdul Razak, perubahan ini adalah untuk memberi nafas baru dan harapan kepada RIDA. Ekoran daripada itu, pada bulan Disember 1965, akta Majlis Amanah Rakyat telah diluluskan oleh Parlimen.

Pada bulan Jun 1965, Dewan Latehan RIDA telah ditukarkan kepada Maktab MARA. MARA merupakan unit terpenting di bawah Bahagian Latihan MARA. Pada tahun 1966, British Institute of Management atau Institut Pengurusan British mula menawarkan peperiksaan jarak jauh atau "external exam". Maktab MARA telah memulakan kursus untuk Diploma Pengajian Perniagaan. Kerjasama dengan Ealing Technical College di London telah diadakan untuk mendapatkan pengiktirafan bagi menjamin kualiti diploma. (Pelajar perlu lulus peperiksaan luar yang dijalankan di bawah pengawasan Kolej tersebut).

INSTITUT TEKNOLOGI MARA (Oktober 1967)

Satu bincian ke atas sumber manusia yang dijalankan oleh pihak kerajaan dan dibantu oleh Bangsa-Bangsa Bersatu (United Nations) pada tahun 1965 menunjukkan terdapat kekurangan dalam melatih sumber manusia di peringkat profesional dan separa profesional khususnya di kalangan bumiputera.

Untuk mengatasi masalah ini, 300 ekar tanah di Shah Alam telah diperuntukkan dan diluluskan untuk pembinaan kampus baru Maktab MARA. Pada hari Sabtu, bersamaan 14 Oktober 1967, batu asas telah diletakkan oleh Tun Abdul Razak di Shah Alam.

Maktab MARA telah bertukar nama kepada Institut Teknologi MARA (ITM). Kerja-kerja pembinaan kampus Shah Alam telah dimulakan pada awal tahun 1968 dan mula digunakan pada tahun 1970.

Seiringan dengan pembangunannya yang pantas, pada hujung tahun 1970, ITM telah diberikan autonomi yang penuh untuk mentadbir dan tidak lagi di bawah Unit Latihan MARA. Ia telah diletakkan sepenuhnya di bawah Kementerian Pembangunan Dalam Negeri.

Sejak daripada itu, ITM telah berkembang sebagai Institut Pengajian Tinggi di dalam negara. Pada bulan Jun 1976, Akta ITM telah diluluskan oleh Parlimen dan diletakkan di bawah Kementerian Pendidikan.

Di perjumpaan yang ke-27 pada tanggal 18 November 1980, Suruhanjaya ITM memutuskan bahawa tarikh penubuhan ITM ialah pada tahun 1956, seiringan dengan konsep penubuhan awal ITM. Walaupun nama yang diberi, sama ada Dewan Latehan RIDA, Maktab MARA atau Institut Teknologi MARA, objektif penubuhannya tetap dikenalkan iaitu Institusi Pengajian Tinggi yang wujud untuk menjamin dan meningkatkan status sosio-ekonomi bumiputera.



KAMPUS CAWANGAN

Universiti Teknologi MARA boleh berbangga dengan kewujudan kampus cawangananya di setiap negeri di Malaysia kecuali di Wilayah Persekutuan Kuala Lumpur dan Labuan. Tiga belas (13) kampus cawangan terletak di Kota Kinabalu, Sabah; Kota Samarahan, Sarawak; Arau, Perlis; Seri Iskandar, Perak; Alor Gajah, Melaka; Segamat, Johor; Jengka, Pahang; Dungun, Terengganu; Machang, Kelantan; Sungai Petani, Kedah; Bukit Mertajam, Pulau Pinang; Kuala Pilah, Negeri Sembilan dan Selangor.

Kewujudan kampus cawangan memberi peluang yang baik kepada bumiputera untuk mendapatkan pendidikan tinggi dan meningkatkan pembangunan dalam ekonomi dan sosial. Ini juga memberi persaingan yang sengit dalam perkembangan saintifik dan teknologi.

AKTA INSTITUT TEKNOLOGI MARA

(Akta Pindaan 1996)

Institut Teknologi MARA (Akta Pindaan 1996) meletakkan ITM seiring dengan universiti-universiti lain dalam negara. ITM telah diberi kuasa sebagai universiti sepenuhnya. Namun begitu, nama lama (ITM) terus dikekalkan sehingga 26 Ogos 1999.

Perubahan utama yang dilakukan adalah seperti berikut:

1. Lembaga Pengelola ITM, Majlis ITM ditukar kepada Lembaga Pengarah ITM dengan peningkatan penyertaan daripada pihak swasta.
2. Lembaga Pengarah telah diberi kuasa meluluskan Perundangan Kecil bagi pihak institut.
3. Senat telah ditubuhkan.
4. Kebanyakan pegawai pentadbiran ITM telah diubahsuai jawatannya. Pengarah ditukarkan kepada Rektor. Pengetua kepada Provos. Pensyarah Utama dan Pensyarah Kanan diubah kepada Profesor dan Profesor Madya.
5. Kajian diubah kepada Fakulti.
6. ITM diberi kuasa untuk menjalankan program di peringkat Ijazah sehingga 26 Ogos 1999 ke peringkat Doktor Falsafah.
7. ITM telah diberi keistimewaan untuk menubuhkan kursus dan kampus seberang laut atau luar negara dengan keizinan daripada Kementerian Pendidikan.
8. Institut telah diberikan kuasa tambahan untuk ia membolehkan atau membenarkan, menjalankan perniagaan, melabur di dalam saham, menubuhkan syarikat dan membenarkan kajian berbentuk komersil.
9. Kuasa tatatertib ke atas kakitangan telah dipindahkan daripada Kementerian kepada pihak Lembaga.
10. Untuk meningkatkan tahap akauntabiliti pekerja, Institut telah diberi kuasa untuk mengena dan menjatuhkan hukuman.
11. Hak pelajar serta tatatertib turut diperketatkan.

UNIVERSITI TEKNOLOGI MARA (26 Ogos 1999)

Pada 26 Ogos 1999, Yang Amat Berhormat Perdana Menteri, Dato' Seri Dr Mahathir Mohamad telah mengumumkan pertukaran nama ITM kepada Universiti Teknologi MARA (UiTM) semasa Perhimpunan Perdana Siswazah ITM Bersama Perdana Menteri di Shah Alam. UiTM juga telah melancarkan logo barunya pada 10 November 1999 di Kementerian Pendidikan Malaysia dan pada 12 November 2000 di peringkat UiTM.